



Jumat, 06 Januari 2023

Ogen: Pilipi 3: 12-14



Erpala-Pala Ndatken Si Arah Lebe



John Locke alu teori “tabularasa” ngataken maka manusia e desken kertas putih. I ja nina manusia e tubuh alu kondisi kosong desken kertas putih. Perdalanen geluh kerna i ja ras uga ia ipebelin mereken ngaruh kerna uga ia i bas masa si pe pagi. Alu kata sideban kita enda e me ulih kai si jadi i bas masa lalu. Terlepas i bas payo ntah lang teori enda, kita pe megati ngenen ku pudi, kerna masa-masa si enggo si bentasi, banci jadi kenangen-kenangen manis ntah pagit bas kegeluhen. Adi kenangen manis lah si inget tentuna malem ateta, tapi buen kap kita nuluh ku pudi nginget-ninget kesusahen, perbeben ras peristiwa gelap si jadi i bas paksa si enggo lepas.

Nginget paksa-paksa si enggo lepas labo salah, tapi lit si terulin silakoken i bas kegeluhenta, e me natap kempak paksa si reh. Sabap si enggo lewat lanai terulahi. Rasul Paulus i bas suratna man perpulungen i Pilipi alu tangkas ncidahken pilihenna guna erpala-pala ndatken si arah lebe. Si arah lebe maksudna e me kai si ijanjiken Tuhan man bana, selaku rasul Tuhan. Janji Tuhan e me kekeken ras kegeluhen si rasa lalap i bas surga ingan senang (ay.11). Masa lalu rasul Paulus tuhu gelap, janah masa si paksana idalanina pe paksa kiniseran, sabap ia arus ipenjara. Tapi nderkuh, numpahi bana ras erkadiola erkiteken kiniteken man Tuhan la jadi carana ngalaken perbebenna. Ia milih ngelupaken si arah pudi, paksa si enggo lepas ras perayaken doni e itadingkenna. Erpala-pala ia tetap setia gelah atan denggo ngaloken kemulian Tuhan. *Erpala-pala ras kiam* e nuduhkenca ketetapan ukur. Gegehna persadanna ras Dibata, arah toto, perenungen-perenungen, penyembahen pujin ras ukurna bulat guna ngakuken kinitekenna i teruh ancamen penguasa. Kecibalta sigenduari labo tampuk geluhta, teklah maka kecibalta si uga pa pe banci ipake Tuhan mabai ku kesenangan.